

四庫全書

集部

欽定四庫全書

集部

雪樓集卷

十九

詳校官中書_臣羅錦森

侍讀_臣孫球覆勘

總校官庶吉士_臣朱鈐

校對官編修_臣楊壽楠

謄錄監生_臣熊輝

欽定四庫全書

雪樓集卷十九

元 程文海 撰

碑銘

趙國公田府君神道碑銘

世祖皇帝肇造九有海內忠智藝能之士咸徵至京師
循名索實寸善必錄人亦莫敢為欺至元南征聞中山
田公善易召問宋平之期對曰丙子已而果然上大悅
欲官之公拜曰臣言偶中陛下幸官臣臣福淺必齎臣

壽固辭賜束帛官其子忠良留侍中累遷太常卿大德末群凶構邪謀危社稷太常力爭之不屈今上入平內難迎立武宗錄功拜大司徒至大二年秋七月有旨錫公光祿大夫大司徒趙國公公聞遽謂二子曰亟廣廳事吾將死吾不及拜命矣命下而薨是月二十有五日也年八十七而廳事之工甫畢賓親臨弔得以成禮某年某月某日歸葬中山翟城鄉王呂杉東原先塋又四年大司徒以狀來請曰忠良與子列周行接燕好三十

有八年矣知先世莫若子幸奮學之筆揭德墓門以惠
我子孫某不得讓謹按公諱閏字閏之其先平陽趙縣
人曾大父官裕州因家焉再世以亂離居中山遂為中
山人大父諱嗣叔字起宗讀書務知大義不為章句儒
有至性事親孝嘗侍疾衣不解帶者四十餘日歲出金
幣易粟貸貧民負不能償者焚其券河北亂人爭來依
計口給食人安如歸盜賊四起郡縣不能制乃聚衆自
保聞天兵且至縱令自便曰爾等宜自逃生毋為我慮

衆感泣曰去將安之遂與二子率衆二百餘人間道詣
睿宗行在所賜金符弓矢拜千夫長漢人降者隸焉為
軍前鋒申裕獨樹原良鳳岡數戰皆有功號敢死軍焉
黃陂之役金兵大合率敢死數百擣其中軍金兵大亂
俄而復發倉卒為流矢所中二子馳殺射者創甚猶戒
子以忠孝語絕而卒年若干父諱子成字成之勇悍多
智畧事父母守家法少好兵書善騎射裕州盜日衆兵
禁尚嚴乃置長竿植利錐其上長尺有半又作袖矢之

法盜聚南山中日索食閭井即預給米為粥以食之唯不敢入田氏門坐五十步外傳言往來既月欲去來需金帛故怒罵辱之忿而退料必復來勞衆設伏以待旦果大至袖矢斃其酋長伏俱發大敗之奪其巢壘輦金帛悉送官由是知名辟聘交至皆不就隨父攻城破柵常為士卒先說其帥田鎮海曰俘多百工有技藝宜存之備任使鎮海言之上上以為然命閱實未幾饑不繼將盡屠老弱及無技能者復進言今之兵為民拯焚溺

也臨陣降者尚不可殺已為民而殺之可乎散之河北
使自食其力足以結人心從之活二千餘家號種田戶
上命兄子實為總管領之子成佩父金符為人匠總管
詣弘州久之引疾上所佩符南還聞河南蕩析留中山
前河北種田者亦來相依所居成聚幸流轉生還計將
終焉屏絕人事日具酒肴速親友酣歌道舊為樂人欲
延致即欣然而往或連旬不返娑娑嬉遊年七十終無
子以子實之子為之後公也孝友篤實力農務學不樂

仕進嘗憩桑下得遺橐滿貯金也守弗去頃之二人踉蹌來揖公曰見吾金耶驗之信悉還其主請以半遺公曰我欲之而待子耶曰願報公德公曰金子之金何德之報尤嗜醫卜之書讀醫書三年悟曰醫不可為也夫人之血氣衰盛陰陽薄戰其道猶可知若微陽伏於盛陰之下微陰潛於極陽之中毫釐不辨生死懸絕而可輕哉棄不學研精於易及六壬之說逮被徵而還技益進復潛心釋典常教二子勤學親師取友以身率之既

而曰占筮之學易大難士雖未學可習而能第用之宜
得其道耳至是父子身被國恩榮及先世祖贈昭文館
大學士中奉大夫謚忠毅父贈資德大夫尚書左丞謚
武康並追封趙國公夫人信陽吳安撫之女慈順儉勤
為婦為母儀于族嫻先公卒與祖妣曹氏妣陳氏並追
封趙國夫人子男三司徒居長次忠亮為臨沂巡檢卒
次澍翰林國史院司直孫男五天澤翰林侍講學士從
規國子生蚤世從矩從鈞從義皆力學女九六為士人

妻餘未行曾孫女二某竊謂皇元建國世祖混一之盛
自古鮮及非偶然也以誠待物故盡物之情以寬御衆
故衆樂為用爵賞當功不求備於人故小大任職而天
下以勸知公之志而不強之以祿卒享期頤之年受大
國之封知司徒之賢而留以遺後果能立功社稷顯名
天下君臣之道胥盡矣嗚呼家世孝弟慈惠而未食其
報忠智才勇而未盡其用源蓄本富以有今日天道果
遠哉易曰積善之家必有余慶又曰知進退存亡而不

失其正田氏有焉銘曰

綿綿有嫺陳後啓齊條流布漢綬唐珪伊祁之墟厥
肩攸棲揚英揆華世載典彝金運波流去家裕州羣盜
滿山禁戎戈矛揭竿袖矢馘醜斃首彷徨四顧何地可
休率衆間關來趨輦下父子兄弟驅馳戎馬或攻而城
或戰而野父中流矢子殺射者欲活爾俘慷慨陳謨殺
降不祥民何罪辜于農于工各總爾徒工處于弘河北
農居翮其南還冥鴻拂天頤瞻河南莽無人烟息駕中

山吾將老焉酣歌暢詠以樂餘年惻惻光祿克承克似
義圖孔傳洞洽超詣優優進退灼灼興廢聖恩孔嘉臣
分知止有子侍中弘毅恪恭身為國維心與天通職在
奉常蠱賊內訌以斥羣翳捧日太空趙邦恢恢山明水
暎維忠與孝世篤其慶有高者阡松茂栢盛我作銘詩
過者起敬

故綏寧令王君墓表

豐城王氏居槎溪上者八世至綏寧君諱義端字元剛

受易於廬陵歐陽先生守道與兄義山俱有名義山字
元高擢宋淳祐壬戌第官于朝君以叔祖泉澤入仕試
進士四與計偕不第以恩監江陵白水鎮辟江州武平
令攝吉州吉水令佐江西提倉幙遷武岡綏寧令累階
文林郎天兵渡江江上諸郡不守德祐元年文丞相起
兵江西熟知君智略辟與幙議君仰天嘆曰天乎事已
至此去將安歸涕泣而謝之自是終其身不出其在吉
也富民葉殺人賄吏以縊聞君當聚檢致錢三百萬拒

之抵葉死豪商奪民地事歷臺部連歲不決逮死者數
人下君治得白黔商而還民地有趙鋹者與弟有隙嗾
家僮七十餘人焚弟廩憲怒欲盡殺之君詣府力爭乃
論如律大兵且至同辟地于贛者四十餘家艤舟城下
夜半叛卒内外起黎明操戈逼舟衆惶恐君奮入賊中
執其渠手諭以禍福率錢帛分勞之衆賴以安誘其渠
詣憲府謝密語憲曰能斬即斬之不能亟安反側憲慰
而遣之同里鄔氏女未嫁而侍婢病死仇訐于吏吏詰

以姦殺婢滅口求賂君白守事以辨周三者殺人委涂而自為證言之令周伏辜其廉直好義類如此晚歲杜門窮經教子郡守部使者時從訪問亶亶竟日惟以忠孝為言人或勸君仕曰我不能死可復仕乎論著有經疑十五篇史論四十八篇經邦讜論二十四卷雜著若干卷大德丙午九月一日卒年八十七自為之誌十二月丙辰葬里之東穰嘉之原曾大父某大父某父某妣聶氏娶趙無子先三十三年卒子男三胡出也希文蚤

世揆今為潮州路儒學教授葵吉安路黃茅鎮巡檢女
五皇慶二年余承乏禁林揆來謁泣且拜曰先子力學
守貞不幸棄諸孤葬已八載而墓上之碑未立先伯父
與公季父侍讀公為同年進士揆又辱游公門幸哀而
賜之言余觀綏寧之才之學不如何人其知己又皆賢
公卿而卒不得一第益有不幸焉者矣然嗜仁如膾炙
赴義如骨肉以明哲而保其身獨非幸也耶即使君為
狀元為宰相棲遲末路為士者恥之其幸不幸又何如

也於乎文信公亦知人哉銘曰

嗟嗟綏寧才豈不足以決科智豈不足以立功而竟然
耶不賢而達余孰少多賢而不達命也奈何有德有年
有子承家若綏寧者我又何嗟

甯求已夫人章氏墓誌銘

夫人諱福順姓章氏世家南城遷綏里父履坦博學豪
宕好遊有聲蜀漢間為外祖包文肅公恠所知鄉先生
吳某居家教授學者數百人元塘先生甯君求已最後

至諸生盡傾人人自謂出其下章方擇壻遂以女妻之
後果登宋景定壬戌進士第仕轉為文林郎某官夫人
幼失所恃事祖母孝謹祖母愛之不忍違離挽元塘贅
其家元塘之父某魁碩剛鯁寡言笑少許可人得其一
言不啻重璧夫人始歸一日祀先夙興執冢婦禮周旋
肅給如世族大家驚曰吾家其興乎家本寒儒夫人蠶
繅組紃以供養祭節縮衣食以植田廬尊上禮下絕甘
分少以厚嫻族撫孤拯弱給贍產蓐以篤鄉黨相其君

子佐洪昇杭三大府遠官嶺外所至號稱能官婦道之盡人用模楷元塘初為洪理因飯必呈官請嘗官不在庭亦唱呼過庭下夫人聞則遣取親嘗又日視庖有餘食命老奴飯囚之羸疾者杭有慈幼局收養棄孩官出錢帛乳哺顧予之者給衣食三年吏卒乳母輩或殘之而以已子代之或以已子冒之夫人密呼乳嫗廉得實以白姦用禁止其在橫浦衣冠辟地者來依元塘延納於外夫人供給於內至者如歸別去莫不涕泗謂元塘

如父夫人如母携家還里道路猶榛梗日語女婦輩曰
萬有不幸吾與若赴水而已母辱人手卒幸金夫人識
量明恕臨事周慎動有禮法每謂某人今然後當然其
事今爾後必爾無不中元塘居官廉介疾惡少顧望常
從容諷諫式協于中子弟成人出必戒以小心謹恪毋
負知己母忝先人元塘晚歲杜門謝世事賓友過從論
新道舊觴豆無虛日亂世遺老優游閭巷十餘年而卒
為完人內助有力焉皇慶元年六月二日以疾終年八

十五子男二立大材器穎異先二十二年卒成大博洽
沉敏嘗佐湖北憲以夫人年老棄歸女二長適同里吳
達次適廬陵朱煒幼嫁而夭孫男二世良世元女三魯
孫四將以某年月日葬雅俗鄉新安里某原其孤成大
以書介信豐令吳越所為狀抵京師請銘余父子叔侄
與元塘相知久余於成大又獨深聞夫人之行懿信且
詳銘非余其誰宜於虜君子之得成其政保其名後嗣
之得浚其學達其志豈非有賢婦賢母哉若夫人者可

謂賢矣銘曰

藹兮蔚柔而一于嗟千年仰維則

謝元禮墓誌銘

南城謝元禮先生以至大四年八月八日卒年八十四
將以皇慶二年某月某日葬太平鄉金塘之原其友潮
陽尹趙艮塘等十人為書介其子升孫所次行實來京
師請銘其墓嗟斯人之不作感友道之猶存勿銘得乎
君諱炎元禮其字也幼孤母孔適盧冒盧姓長通六經

長於易前輩老生皆折節與之游盧甚賢之兄天錫死
一男二女皆幼稚君憂曰謝氏絕矣日夜號泣乞歸謝
盧不許踰年乃許歸則撫遺孤開門授徒以給衣食嫁
娶母喪哀毀致疾終不御酒肉疾殆夢神人為方授之
而愈卹盧之後尤極恩意亡友傅氏子窮餓不能自存
輟食以飯之不足又營度儲俸以給之傅日來取米如
寄數歲傅死乃已平居見子姪及親故之子行脩學進
喜形於色不則感然以憂雖屢空未嘗干於人太守趙

時稼聞其賢館之郡齋或訟于郡弗直覬君一言君終
不言有賣炭者過門君售之既償直頃復還其餘賣者
怪焉君曰汝適言若干今踰若干以還汝不受強必與
之其臨財若此所遇雖極貪濁暴抗莫忍欺君學者相
從不遠千里往往擢高科登膺仕君再賦于鄉而已宋
亡郡有盱江書院居西城之外當兵衝白于郡遷之城
中身經理之既成郡檄君為長亦不就晚病目稍讀佛
書卒之日方與升孫劇論圓覺金剛經倏然而逝有觀

易若干卷藏于家曾祖鼎祖榮父起祖妻左氏先卒子男二長升孫慎修好學次謙孫蚤世女嫁崔萬有孫男二皆生九年而夭余嘗聞賣炭事好為人道之輒掩口盧胡以為闊迂嗟夫世復有闊迂若謝元禮者乎薄物細故而不欺若此世之紛紛為奪為盜者聞君之風亦可少愧矣余識君踰四十年乃今銘其墓於萬里外南望慨然銘曰

神明通孝之隆卹孤窮義之從窮約耿介有李泰伯吕

淮園之遺風嗚呼維公

大慈化禪寺大藏經碑

佛以慈濟為善教人以布施為善果施之善莫大於經
經者佛傳心設教之具也而其為書繁多世鮮能備亦
莫能以是施儀天興聖慈仁昭懿壽元皇太后命刻大
藏經板于武昌既成輦至京師印本流傳天下名山巨
刹則賜之皇帝即位之三載為皇慶二年夏四月袁州
南泉山大慈化禪寺住持普蓮宗主明照慧覺大師慈

昱以是請乃命有司具舟車函載驛置即其寺而賜焉
寺乃普菴寂感妙濟真覺昭貺大德惠慶禪師道場也
昱屬其徒嗣嵩來京師請某文以志其事以侈上賜某
竊惟佛有教以來累朝崇尚之至四海感化之普未有
盛於今日者皇太后以佛慈濟為任刻經布施俾天下
之人聞經悟法興善遠過臻于休明其功德弘遠矣夫
經精粗隱顯無可罅漏隨感而觸無間賢愚皆普菴一
讀華嚴合論汗流被體直透上乘遂基数百年香火而

其教漸被于四方四方之人懷金負貨衝衢溢陌所祈
必應如食得飽寺無釜庾之田日飯數千之衆功用明
焯如此可不敬哉普菴本末具載諸碑昱其嫡嗣也行
卓量弘寺再焚再建益雄麗環索之境陸之榛險者闢
而夷水之阻絕者梁而通有以利衆竭智畢力師益守
普菴之教者而皇太后心佛之心果益脩教益彰宜矣
經以某月某日至索官僚稚耄迓于境上饒鼓幢轟雲
合雷奮動盪心目如親普菴如見諸佛遂以是日宣旨

安奉于寺之大藏云謹再拜而獻文曰

佛之設教彌亘千葉出言為經經以寓法法如朗日高懸
太空向之者明背之者蒙赫赫我朝崇佛尊經宣其惠和
天下謐寧惟皇太后心與佛會勒經布施周被四海南泉
之盤大禪所安其居桓桓登降照爛朝集千車暮攢萬鞅
惟禪是依維佛是仰琅函瓊笈降自天宮迷者倏見瞶者
頓聰萬衆驩呼百靈鼓舞戴以巨鼇天龍為護凡誦是經
及聞經者願如普菴一語汗下徧恒河沙皆被佛力成

是功德以報皇國法輪團團聖壽如天奉我太后彌億
萬年

魏郡伯申公神道碑

太常申卿之父卒之四十四年天子推恩贈中議大夫
上騎都尉追封魏郡伯母追封魏郡太君明年將伐石
表墓以文屬余申古姜姓之國於周為伯爵其後以封
為氏宋徽宗時有諱天祿者居汴善為方供奉掖庭門
懸金斗以識號金斗申家兵亂徙秦州之社樹坪是生

良輔良輔娶馮生仲庚字西叔是為中議公皆世其業
中議公好仁樂義智勇過人年弱冠天兵下河南身馳
戎馬陝虢申裕間盧氏縣守將約囉君總管馬君聞其
賢拔置戲下舉族往依焉宋游騎突至獲約囉殺於熊
耳嶺公率敢死數十人赴之誓不得屍不返果得屍以
歸事定秦州舊業無復存者願申土而樂之曰吾申人
也今至此非天欲復其始乎策之吉因家焉訪嫺族之
在者惟得姨母之夫于申女之叔于穰皆養之終身歲

具善藥以備鄉之有疾而貧者若窮途逆旅無所歸者
必躬自調護又裹糧橐金俾達其所止無問邑里姓名
有富民夫婦暴疾垂絕公以方匕起之約酬兼金良馬
不果酬鄉人誚之公一不問常教其子曰人與天地為
三天地以生生為心而人不能推而擴之猶謂之人乎
昔人以醫比相良有以也敢不勗哉至元己巳六月十
有八日卒年六十七遠近聞者如聞父兄之喪夫人京
兆宋氏柔順端凝不妄言笑有為婦為母之道後公八

年卒年七十一合葬南陽縣東泓河之薛家原子男六人政郡監酒教河渠使敬太常也整亦監酒敦蚤世敏提舉江陵醫籍孫男八人克莊克柔克實克溫克強克恭克毅克廉嗟夫世常謂善之不可為天道之不可信誣矣哉予觀天之於不善人常若厚然而一朝之敗如摧枯拉朽如燎毛洪爐何其易耶於善人常若薄然而傳世數十彌遠而光逾久而昌又何篤耶申氏由汴而申四世矣太常君始能結知世祖出入供奉未嘗不稱

昔每候上問進苦口之言未嘗不嘉納至有身不滿七尺而辯雄萬夫之稱被玉帶白金之錫服勤四朝眷賚如一歷御藥院使祕書丞祕書監大常卿致仕通顯矣而考妣享茅土之榮兄弟子姪有鄉里之譽居申之吉斯其徵乎謂善之不可為謂天道之不可信果誣矣哉
銘曰

為善之方莫醫之良天地之德鬼神所藏昔有金斗式顯于梁徙秦而申四世彌昌其系維申始封維伯家復

于國封復于爵伊善之崇其始其復洋洋魏邦勿替攸蓄

莘縣楊氏先塋碑

左司都事楊君昇士允孝友人也皇慶二年秋遷江西行省左右司郎中喟然來謂余曰昇之先自曾大父始居莘曾未四世散而之四方者有矣吉凶之禮廢緩急之義闕親者益踈而踈者益遠今苟無述焉將何以考訓于後按家牒訪遺老得曾大父之槩附以系次之略

敢請以銘乃詳而叙之楊之喬出漢太尉震世居弘農
之華陰至諱陶者徙汴事宋徽宗為易州儀曹金拔燕
死焉大定間子登朝贈朝請大夫朝請生通奉大夫永
定軍節度使邦基詩畫妙一時嘗為秘書監有名生奉
直大夫郊社令皓奉直以上皆居燕死皆葬燕城西南
十里赤村之原奉直生歸德監酒庭直字端卿是為昇
之曾大父弱冠以澤補承奉班祇候一日內直忽暴疾
若癰昇及家而瘳居累年自謂分薄不復出貞祐南遷

思名臣之後強起監嵩州酒復監歸德酒金亂隱居嵩山習射獵壬辰北渡遂家于莘以詩禮訓子孫而性嚴重善容儀燕不惰行不趨衣食喪祭動適豐儉邑人化之尤博涉典故每談歷歷如畫晚潛心養生之道年近八十猶能細書作行春秋薦獻齋明盛服拜俯進退不少怠以大定辛丑十月二十三日生于燕某年戊午九月十四日卒于莘縣西南三里西廉之原娶賈氏先卒有子曰某小字解愁少落魄好游俠女蘭英適汴梁

張某玉英適河南都監史某繼戴氏先八年卒年六十
九有子曰澧字瑞之沉毅慎介少與父居高孝養無違
禮號長者年七十二卒淵字澄之嘗任百夫長卒于碭
山某小字泰安金亂與長兄解愁皆失所在女秀英適
潞州馮某惠英適易州王某澧有兄曰滋字榮之他姬
賈氏生也孫男八人滋娶李氏生子三居仁字子靜仕
江淮間為漕運押綱官居謙字子益歷考城等縣典史
居中字子庸澧娶張氏生子二居寬字子裕為國朝名

臣累遷中奉大夫參知政事至元二十四年以剛直忤
權奸死于位年五十五居簡字子敬年十八試吏從世
祖南渡積勞凡九遷至奉訓大夫知唐州所至號能官
後以愬其兄寃還所籍入復官其二孫為人所稱元貞
初卒于官年五十七贈大中大夫大司農卿上輕車都
尉追封弘農郡侯諡正惠配梁氏追封弘農郡夫人淵
娶孫氏生子三居貞字子正居義字子宜慶元路定海
縣主簿居信字子誠曾孫男二十有一人居仁子昆居

謙子昂昂居中子晏昌易炅居寬子勗景勗為集賢學
士奉直大夫卒居簡子昇左司也嘗歷監察御史禮部
郎中有盛名曼濮州觀城尉居貞子昶居義子暹旻晟
曇晃昱居信子昇杲旦女若干人惟勗景昆逮事歸德
君玄孫男二人元鈞同知冠州事元鐸濟寧錄事判官
皆景之子今居仁之後家汶居謙之後家太康居中之
後家息淵之後皆家鎮江餘在莘凡叙歸德而下書卒
而不地者皆在莘書卒而不年不名者闕也於序古今

喪亂以來強宗大姓崩離蕩析淪胥漸盡者可勝計哉
有敬先敦後懇懇焉若左司者乎由太尉以至於今蓋
千數百餘歲矣猶赫然為天下望族其所蓄豈不深固
哉後之子孫苟推左司之意則自莘而上孰非追思永
慕之地而何踈間之患耶傳曰慎終追遠民德歸厚矣
楊氏其庶乎銘曰

維歸德肇於莘紹弘農期永延裕之忠敬之恭澤滂流
沛溶溶繫左司祖之思悼厥支逖以離纂前聞訃後昆

揭玄礪耀景文歸我我莘之墟千萬年念厥初

彭城郡獻穆侯劉府君神道碑銘

上初即位定封贈之制秩二品者恩及祖父於是河南
江北等處行中書省叅知政事敏中之祖贈嘉議大夫
禮部尚書追封彭城郡侯謚獻穆配馮氏趙氏並追封
彭城郡夫人公諱鼎字漢寶姓劉氏濟南章丘人美鬚
髯有器度語音如鐘博聞強記不事舉子業臨機制變
才智提出時人方之管樂云公生有異質方歲許母欲

立之地弗下席焉乃下再試復然人亦奇之年十五父當之官顧公曰汝了家事否公對曰第去勿憂也及父代歸貲產倍去時鄉人為之語曰劉五郎可謂男兒十五奪父志矣金季喪亂民多失業公慨然曰明昌初歲大旱吾大父發廩以濟民泰和間自冬至春大雪吾父日為粥于門以食過者祖父遺我以厚吾可獨薄乎且緩急人之所常有也坐而視之仁者不為乃推財發廩賑乏食饑遠近踈戚皆賴焉已而寇盜四起骨肉不相

保有壯士五十人來從公願為守衛問之乃嘗所調卹者故終喪亂之世家無一日之憂者五十人力也頃有盜柵歷城南山中為民患郡邑不能制公獨從一二人直登其柵喻以福禍賊懼從公降以功授忠顯校尉歷城令境有大澤號遙墻灤豪民李據其地為姦徵令不行公一日往灤中伏壯士道傍以一老嫠者自隨至其門門者識公趨入公隨以入李方袒跣卧堂上使一女子扇見公愕然公徐曰適以公事過此故來相訪李喜

起迎勞命酒酒飲設食食盡極歡而罷握手以出語且
行公屢顧示將密語者李麾左右去復行至前伏起執
之以歸杖殺之金之亡諸侯分制各郡濟南張侯聞公
賢召以自佐及歸國朝侯行省山東公授廣武將軍益
都總判兼安撫濟南淄德軍民勸農使行左右司郎中
事時庶務草創翕張施置一以倚公泛應曲當動為成
式益都李全聽讒分三道舉兵攻濟南侯大怒謀悉師
拒之公方久疾曰彼衆我寡將若何扶憊入見侯曰侯

母怒侯第入老夫為侯却之公立遣四使致書李全及其三帥三帥得書勒兵待命全發書撫掌大笑曰我固言之矣此老在何益趣罷兵脩好如故壬辰正月二十九日以疾卒春秋五十一葬邑東南五里綉江東南壩廣平之原先人兆次先世葬邑之錦川至公始自大父而下遷于今塋大父諱照有才學以貲雄鄉里不居賤得之貲不徵難償之責號為長者父諱珂嘗喪兄不御酒肉三年終長清豐齊稅監公再娶皆有賢德馮夫人

年六十二卒生女一適馮趙夫人年七十三卒生子四
長景石歷濟南總府山東轉運經歷濱州教授贈正奉
大夫叅知政事追封彭城郡公謚文靖次晟章丘令次
昱次昂女適韓孫男七人女五人景石子曰敏中今翰
林學士承旨榮祿大夫知制誥兼脩國史曰乙早世長
女適魏次適常晟一女適霍昂之子曰大醜曰某皆早
卒曰敏政曰某某長女適韓次適曹曾孫男若干人女
若干人蓋公死後三十餘年天下統一至今君子猶悼

之曰向以劉將軍雄才膽智使得遇世祖以驅馳卿相
豈足道哉惜也天不假之以年命矣夫皇慶二年秋翰
林君追述祖德疏上恩屬銘其墓道乃撰次而銘之銘
曰

昔在金季中原雲擾諸侯擁衆保其城堡羣盜滿山野
無青草洗洗廣武奮自儒門或執或誘盜潰以奔遂佐
濟南歸我聖元既有旌旄亦贊省垣飛書却敵如魯仲
連國有能臣民有慈父胡不愁遺仰及世祖坐籌帷幄

折衝尊俎管樂雖賢猶愧于古生不盡用死有餘榮千載盤盤觀我彭城

清州高氏先德之碑

清州守高從簡以集賢學士王君德淵所狀先德介集賢大學士陳君顥謀不朽於余謹按高氏齊公子高之後從簡五世祖居河間有子五人勝用誠敬恭敬仕金至泗州通判恭遼東縣尹用娶張氏生三男慶進祿金之亂天兵略地河朔携家往依信安張侯侯營砦固守

父子常在行間貞祐南播舉家渡河客陳蔡間金亡北
還販粥於冀居南宮復遷靜海卒葬獨流村慶尋徙東
安後家清州慶字伯福倜儻仁愛好學樂施在東安時
日浮舟往來逐鹽鹽之利嘗遇盜亡其券盜敗獲券召
驗辭以未嘗遇盜人怪之曰彼窮餓迫耳我言吏殺之
矣在清州歲饑糴于大名舟次宋家口老稚數百遮拜
曰不食數日矣幸全活散其半而去娶蔡氏生五男通
信仁義仲一女曰壽仁字濟川年十二失怙母教之學

日誦千言長習律令喟然嘆曰為吏受賕獲罪辱先守
廉奉公衣食弗給長蘆當燕齊之交天下之要區也鹽
鹽之利半中州之賦豪商大賈車擊舟連可廢著為業
乃從張運使徙居焉中市而立權天下之貨四方販負
日受指畫操其要因其勢豫其時審其地人什常貧我
五常富故言利者以高氏為師而好仁急義有父之遺
風焉嘗早行得遺物一囊物色其主還之留其半為謝
竟不受友人姚仁甫私以鹽引五百寄之賣買疾病無

子曰我死寡妻願托命焉無一言及所寄姚死給其家
三年屬兄弟異財乃悉以所寄歸之又贖里中臧獲之
良為齊民者二家嫁娶族子姪之貧者十餘仲光居兩
舍外死而孤寡無所養割私產以厚之籍在軍伍命從
簡於河西構屋數十間僦以給其役不以及諸昆弟母
疾衣不解帶母戒之就寢曰兒幼失父不知侍養嘗自
誓遇人患難必相扶持而況母乎居喪哀幾於毀仲父
季父皆久疾且死湯藥葵送咸竭其誠歲丙寅遷其母

及二父喪葬清州河東之上管村踰四十年高岸為谷
大德丁酉復舉三喪洎親族未葬者一十七喪營於長
蘆之郭家砦環植松栢千餘株明年放逋責三十五萬
緡有奇五月二十九日卒年六十八六月十有五日葬
于郭家砦之先塋送者千餘人娶褚氏子男一從簡也
以吏起家由清鹽司判官九轉而知清州積階奉訓大
夫孫二曰興宗曰朝宗夫自太公有勞于周封于齊富
國畜民桓公以霸而子高之後世載史氏豈非有積德

耶河間數世遭值喪亂用鹽監起卒大于清州亦以長者然耶清州之先數有天幸曾大父避地信安孫通俘于兵事定復還南渡既登舟追騎奄至子慶弗及投水就舟獲全其祖父所友多天下名士伯福之友曰竇文正公默濟川之友曰馬右丞紹李少傅謙夾谷尚書濟吉耶律祭酒有尚高都水仲淵其尤著者銘曰

營丘始封富用魚鹽九府既脩桓景具瞻子侯之相命氏以高派遠條敷載籍彌昭降及河間蕩流懋遷伯福

操舟濟川居塵擅利天下馳聲諸侯濟衆遺恩棄盜忘
仇人言貴富禮義乃生苟非其人色變豆羹國富保民
家富睦親積流成淵積行成仁藹藹清州碩膚以完揭
德先塋千載攸觀

揚州重建玄妙觀碑

至元中詔賜天下天慶觀額曰玄妙凡省臣守臣軍府
外署在其治者歲時朔望咸集而祝釐焉他觀莫得與
比故天下玄妙觀宏壯嚴飭罔敢怠荒惟揚州歲久弗

治蒼蔚圯委狐伏鼠竄列像弗蔽贊拜無所風雨驟至
折撓相枕藉大宗師過而見之曰是吾責也選道士領
之得馮道原任以脩復之効未幾馮死時凝和冲妙崇
正法師教門高士九江雷希復瓶通真觀于真州曰是
可任即命以揚州道場攝觀事董其役至則料材用之
實十無二三焉乃謁寓公巨家賈市商舶量錨最銖以
聚之不足又割通真之贏以佐之寓材于江伐石于山
徵工役徒畚糞壤正表位早作而夕息悅使而勤省悉

新之廣殿崇陞重門脩廊會者在堂燕者在室庖廩廐
庫各安其次鼓有嘉響鐘無厲音神示顧享倪羞嗟嘆
嗚呼盛矣惟天大建元德啓大宗師懋宣玄化光翼四
朝流聲布烈充軼內外授賢任能敷弼弘教一起高士
赫然揚土不亦賢乎而昔者老聃氏之去周也徘徊關
吏豈有意嚴尸祝而雄棟宇哉然自古聖主名臣功烈
之及民者咸秩而祀之矧茲道德之隆乎而余竊有感
焉一土木未足多也非知人善任則百年之廢猶故也

況其大者耶是役也經始於至大戊申之冬落成於庚戌之夏贊其言者葆和純素持正法師揚州路道判上官與齡皇慶元年夏大宗師以聞降璽書護持雷希復本觀住持提點明年秋屬廣平程某為刻辭辭曰

道以體求鴻荒寂寥道以用著神人景昭盤盤廣陵淮海攸經翼翼靈宮既廢而興惟大宗師手攬玄樞握陰抱陽贊我聖符碩瞻海邦雨潤風飛有弗軌儀為教之疵矧彼玄關通都廣屋顛而不扶咎孰執焉既獲其人

績茲成功歲魏廓深臣民具恭匪授罔受匪承罔成惟
師之明惟雷之能施於有政壹是此心曷績弗凝曷土
弗欽真源綿綿帝壽如天刻此好辭垂之萬年

洞陽萬壽宮碑

聖天子承熙洽尚清靜天下之崇老氏號為宮為觀者
廢而興微而著可數已臨江新淦之東二十里有地曰
洞陽有山曰皇人之山相傳晉許旌陽所游憩有觀曰
洞陽之觀不知始何代傳次住持道士郭務玄居之郭

君秀朗邁越好道術文章大德六年謁余武昌東遊龍
虎山見三十八代天師天師奇之授龍興玉隆萬壽
宮講師三年改惠州道判未幾遷臨江至大四年詔天
師入朝郭君白言弟子所居洞陽地夔產薄宋淳祐間
幾廢賴住持朱可道力振之今幸遭聖代非大有建樹
能終保無他乎惟師留意即日更定觀額曰洞陽萬壽
宮取道經天真皇人之語名其山曰天真福地以告玄
教嗣師師曰宜如天師命皇慶元年上之集賢以聞特

降璽書授務玄宏道通真崇教法師洞陽萬壽宮住持
提點是年秋八月開宮布職一如王隆故事官屬虔恭
稚荂讚歎咸躋上之賜嘉君之勤君又曰是徒美其名
耳非壯其棟宇無以稱上恩非廣其田疇無以接四方
而豐屋大厦賢人達士聞而効財効壤者不謀而旁集
遂盡撤其屋而新之其中曰金闕寥陽之殿東曰開天
之樓西曰錦帷之閣亢以重門翼以脩廊會有堂燕有
室寮次廣邃庖廩宏固榜其闕曰都仙之府凡為屋若

千礎費若干緡經始於某年某月落成於某年某月闢
田若干畝曰萬仙莊居養並舉報稱兼至山峙然以大
水漑然以浚人于于然而來矣衆益喜君之志有成曰
不可以不識乃謁文於予予觀老氏書其言理身治人
之道詳矣類非今所為者若旌陽則世所謂列仙之流
然其功於人甚大施之秩祀也固宜郭君儒者誠能去
巫覡之末求清靜之本俾天下嶻然知老氏之為道如
此則是宮也將必以君故名天下亘萬世又奚止如今

日之觀哉重為之辭曰

迢迢洞陽巍巍高山上有玄雲下有流泉洋洋新宮內
明外暎昔也何衰今也何盛郭當其世初寔病之其師
為言天子命之載經載營亦既勤止來游來憩以養以
食我觀世間孰不可為曷成匪公曷敗匪私道以人弘
地以人勝我未克正物孰之繇正既新爾宮爾田亦豐
繫古有言擇善而從晨鍾杳杳夕鼓考考以祝聖人之
壽莫若有道呼役神物訶厲譴慝以徇世人之欲莫若

有德維道維德可以上佐天子躋天下於仁壽之域咨
爾洞陽罔有弗欽此非予之言乃老聃氏之心

雪樓集卷十九

欽定四庫全書

雪樓集卷二十

元 程文海 撰

碑銘

彭城郡劉文靖公神道碑銘

有元碩儒濟南劉公抱器懷寶不及大施於天下以死
爰有家嫡誕襲厥慶克浚其道以學行為天子大臣從容
進退作世模準皇慶元年推恩二代公贈正奉大夫參
知政事追封彭城郡公謚文靖配魏氏追封彭城郡夫人

人明年公之子與余同官未幾移疾去示廉鐸行狀請
為文碑諸墓道以肆上恩謹按公諱景石字文瑞章丘
人曾大父諱照好學樂施大父諱珂以孝友聞金長清
縣豐齊稅監父諱鼎有王佐才國朝為廣武將軍益都
總判兼安撫濟南淄德軍民勸農使行左右司郎中事
今贈嘉議大夫禮部尚書追封彭城郡侯謚獻穆母馮
氏繼趙氏並追封彭城郡夫人公生而卓茂十歲通五
經能詞章尚書公與客語公侍有持火鐮過庭下者客

命賦詩公應聲曰金惟主斷割茲鎌復何謂出火濟窮途本以剛為貴一座大驚由是知名年十四丁父艱居喪哀毀或勸從刀筆吏可速達公曰學儒先志也可舍而他乎學益篤後稍從仕以廉直自立淄萊二州新城蒲臺長山三縣咸統于淄吏治曠軼公私交弊行省檄公監治期月之間政化大行上下悅服歷濟南總府山東轉運經歷奉職不回久之自以剛潔不能低昂以疾免歸日與長山某叅議清陽張郎中益津高提學大定郭

處士邢州智處士中山王詳議為忘年交商校經義評
論古今以夜繼日或見其貧厚相賂遺雖故人弗受也
嘗曰世味不可深深則難返私惠不可受受則難報晚
讀釋老書曰此可以治心不可以治世可治心而治世
者舍聖人之道何以哉其子多疾手書戒之曰曾子有
言吾日三省吾身汝亦當日三省汝身飲食起居中節
乎視聽言動合禮乎進德脩業及時乎毋以荒恣敗身
毋以自信敗德毋以因循廢學至元更化憲府交辟不

起俄授濱學教授曰上命也不可辭到官再宿而去濱人止之不可留詩為別末云駕言陟秦臺放目豁憂煎跂足望東海大聲賢魯連蓬萊如可到隨此謝世緣涼風吹客衣日暮生蒼烟徘徊不能去心思空茫然還濟南二十三年五月二十日卒殯歷城東之七里原大德九年六月七日葬章丘明秀鄉祖塋西南之新塋魏夫人祔初尚書公擇婦曰莫若魏負外之女魏君正人女必賢遂求婚夫人貞靜孝儉範于中外至元二十四年

八月十三日卒年六十七子男二長敏中由河南江北
等處行中書省參知政事為翰林學士承旨榮祿大夫
知制誥兼脩國史次早世孫男四燕孫燕駒皆下殤從
禮從道方力學女二長適承事郎利用監提控兼照磨
魏誼次適士人常文孫嗚呼日月不居典型彫謝余與
公之子上下三十年慨想公之風流渺長往而不待庸
辭謬學乃得備載記於無窮不亦幸乎惟公之志誦其
詩可知已公之道觀其嗣可見已所以封名邦錫美號

流耀金石與國同其休豈非天哉銘曰

孰生哲人伊濟之南有鏘其音如玉如金哲人維何其
碩伊劉志與時仇身與道周桓桓劉公人憂我樂孔孟
不遭後世誰若父昔王佐子今國器維公之樂雖死弗
貳膺膺彭城厥土千里茫茫新封如帶如礪相古哲人
罔屈匪信維哲且明以覺後人

福州西禪寺用晦暉和尚塔銘

達摩得法南海上第六祖慧能居曹溪禪宗常盛於東

南宋之季若癡絕無準雪岩霜林之屬軌物牖民學者
萬數天子遣問公卿致聘氓俗士女虔禮拜跪交絡門
路此必其道有足尊者至元中予廉問閩海識西禪大
師圓智慈慧魁大混合實而不野通而不肆端源呈舒
蒼翳荆刊高坐講演疏達飽蒲挂拂所示懸解妙悟究
其授受蚤獲游從諸老間予益信君子之學必有由來
師諱道暉池姓福州懷安桐口人年十五出家事候官
末山寺仁遠大師受戒具繇西禪出江西遡浙江而歸

凡歷諸禪一充維那三掌書記一主前板自景定元年
秀峯出世至西禪十居壇場退處西菴年八十四無疾
而逝是為某年十二月有五日藏于西竺之西塔曰怡
怡之塔在神光時嘗買大藏經一藏入寺又置田園相
其弟峻師建顯慶禪寺于西竺皇慶二年秋其徒端堯
等走京師謁銘惟師道峻而德淵體空而化弘悼前修
之不作懼正法之莫傳予又嘗挹其風儀接其聲聞銘
不可已已銘曰

佛法南建其妙曰禪達摩既東曹溪六傳學熾徒緣道
流德宣與時汙隆隨山為川暨于西禪盛事諸老涉吳
歷楚霜披雪槁居壇秉拂用信厥道其明昏昏其晦
皜皜真源未息末教橫被師顧而憂人競而靡西菴既
謝為悲為喜其來非行其去非止福州荔枝綿州附子
西竺之西微言斯紀

河東郡公布都公夫人李氏墓碑

夫人京兆李氏金進士試長安令諱居寶之女皇贈正

奉大夫護軍河東郡公諱布都納之妻榮祿大夫平章
政事商議中書省事察罕之母元光壬午十有二月四
日生至元戊子正月十有九日卒某年某月某日葬墓在德
安孝感之白雲山平章任湖廣理問日買田宅于茲因
葬焉至大庚戌某月追封河東郡太夫人皇慶癸丑九
月以狀旬文刻諸墓初長安君娶蔡氏生三女夫人居
其仲始九歲隨父官洛陽天兵南伐城陷家破軍帥成
格勒一見夫人驚曰此女丰度異常他日必貴問其姓

曰李氏而帥之妻西夏主之後也亦李氏乃鞠如己子而恩意加焉成格勒者諸王錫喇之愛將也時河東公以巴喇勒哈歸命數從王攻戰有功與成格勒同官于解後以不肯代成格勒為總管成格勒賢之以夫人歸焉因家于解夫人躬節儉慎喪祭和上下正內外不動聲色而教被嫺族不出閨閭而化行邑里河東公亦未老而謝事優游鄉井終其天年號為善人長者人謂有警戒相成之道焉其子八人長平章也博涉經史才德過

人早為忠宣公鄧囉齊所知拔置幙下累遷為湖廣行
省理問改行樞密院經歷棄官讀書白雲山俄起為武
昌治中河南行省郎中入僉詹事院事進昭文館大學士
太子府正拜參知政事尋以平章政事議中書事廉慎
廣厚所至稱賢次博囉早世次博囉徹爾敦武校尉百
夫長次博囉台湖廣行省宣使卒次博除太倉令卒次
濟噶台封武畧將軍寶慶路達魯噶齊次多羅台性至
孝樂志琴冊高尚不仕朝廷為旌其門次鼐滿台敦武

校尉邵陽縣達嚕噶齊子孫曾玄七十餘人皆足世其
家嗚呼讓其德之至乎河東一讓夫人以歸遂基百世
盛大之業忠孝萃於一門夫人固詩禮之胄脗耶賢矣
哉銘曰

讓為德基化由內始河東秉義公侯繼起藹藹夫人婉
婉令儀蘭闕其芬玉韞其輝維儉維勤克慈克孝家承
內則邑被陰教維京兆父厥懿攸鍾維河東公爰配以
隆葬雖邦異封則同壤白雲央央焄蒿悽愴是夫是婦

是母是子刻此銘詩百世之軌

故國子助教李性學墓碑

至元二十三年余以侍御史行御史臺事被旨求賢江南過揚州會故人為提刑按察使曰郡庠有李性學先生識之乎曰未也極道其問學文章余固願見使三往不見連騎詣之終不遇自是性學之名職職胸懷間遂歷西浙江東西得士二十三人獻之天子天子盡用之布諸中外愈恨不得李性學先生還臺性學適長明道

書院得與論議窮日夜談經博達精粹超詣獨見易詩數百家可坐析立辨也為文闕密深厚類永嘉葉適又博通星官歷翁浮屠道士百家之言私獨念曰苟入侍必與俱一日忽持一卷書詣臺言僧格必誤國累數千言衆大驚以聞未幾僧格果敗天子立徵性學至則以為國子助教學者數百人凡經指授莫不充充然相慶以為得師公卿貴人皆折節願與交名動京師已而竟以疾卒無子弟親戚以治喪無贏錢財以給喪今江浙

等處行中書省左丞吳君某與三教知己以禮葬京城
西南三十里盧溝橋之南吳君某園中皇慶二年夏吳
君自江南還憮然謂余曰嗟夫性學不幸客死今若干
年矣吾雖去京師往來余懷也吾懼死者日益遠知者
日益寡不有識焉盧溝之丘且夷矣知性學莫若君君
其為文吾將磨石刻諸墓性學庶幾不朽矣盧溝南北
使客之衝千載之下豈無賢者哀而酹之也嗚呼始終
哉吳君乎夫吳君位丞弼名天下非待假託附麗以聞

今顯後而惓惓焉一窮士死生之際亦可少愧天下輕薄之為交者且性學數千里外孤生雖甚賢不見斥於人顧已幸又何望得此於人哉吳君可謂知友道矣可謂義人矣性學之賢從可知已性學名淦建昌南城人世為詩書家其人魁大少飲酒一食能盡肉數斤善談論達政治不娶不知有男女事或端坐至旦奇士也平生著作頗富聞河中知府田行多得而藏之惜已死不及出而行於世卒以某年某月某日葬以某年月日得

年若干銘曰

于嗟乎性學知足以知聖賢而學則闕矣氣足以怵公卿而言足徵矣行足以信友朋而沒獲寧矣而年不永位不稱丘首不克正命也夫命也夫

羅堽墓誌銘

皇慶元年秋盱江吳東之病于京師廣平尉明安岱爾慕其名載與俱歸邯鄲不數月竟死明年冬十有一月二十有七日其友豫章羅堽亦暴死京師二人余知也

一歲之間俱喪焉未有以抒余悲延祐改元春三月杳之父某來歸其喪長秋寺卿訥古德勒謂余銘以慰其父心初杳來京師其同舟者寺卿之子也因就杳受司馬氏通鑑歸而言之父至是薦授長秋寺架閣庫管勾兼照磨居官三十有六日而沒時年二十八晨余識東之於武昌余見其學也若古人然其氣貌萎繭言呐呐不能出口知非遐齡之具也及上即位之初余被召過豫章杳以書謁余又數見于此余觀其骨勁而神潛

類致遠器者寡言而專志類善養氣者不意其遽死也
其父之言曰壺幼而知孝年十二即却酒肉以祈親年
長而知學叢書數千卷日以從師取友讀書績文為事
常夜分不寐或遂坐至旦又示余所纂記著述誠用心
勤矣豈以勤心之過反促其齡耶壺之於東之非徒友
之益師之也皆苦學早死然壺有父以歸其喪東之之
骨未知孰歸之也悲夫壺字奕高娶嚴氏有子曰謙始
八歲女二俱幼以某年月日葬某縣某鄉某原銘曰

幼而期壽其親兮父則歸爾骨也長而學致其君兮祿未逮而沒也彼邯鄲之丘兮則孰為之碣也其不幸也耶其幸也耶

元都水監羅府君神道碑銘

維至元十有二年世祖皇帝下江南招納降附總攬英傑披腹心揭恩信靡不揚聲奮烈移忠本朝以成聖人立賢無方之美國之得人莫盛於斯若都水監羅侯其一也侯諱璧字仲玉年十三而孤事母則以孝聞長而

魁岸沈驚好學善騎射初習舉子業既而歎曰大丈夫
生世當以奇策取勲名安能卑卑作腐儒語耶聞蜀帥
朱禕孫募士即仗劍往從之一見大被器使累功為武
翼大夫制西路馬步軍副總管帥移鎮荆湖辟與俱至
江陵天兵大入境率所部忠銳軍降會太夫人訃至歸
葬乃入覲授宣武將軍管軍千戶隸丞相阿珠招收淮
軍討歛寇有功領本州安撫事十五年從張元帥廣南
賜金符轉明威將軍管軍總管鎮金山居四年海盜屏

跡徙上海督造海艘再月而畢明年朝廷議轉江南之粟以實京師下其事行省侯獨以海道便部漕舟率先道海自楊村入不數日至京師賜金虎符進懷遠大將軍管軍萬戶兼管海道運糧二十四年納延叛給餉遼陽浮海抵錦州小凌河廣寧府十寨務加昭勇大將軍又明年督漕至直谷既輸之倉白潞河決漂廬舍突障塞勢益張官吏凜凜侯為方樹柵築堤捍之倉以完錫宴中書堂陞昭毅大將軍同知淮西道宣慰司事使

貪暴列城化之民不堪俟循行郡邑籍其罪以示之大
恐求自新使亦衰止於是簡獄訟均賦役脩政令興學
校正造作之法嚴漕運之防政教大行進便宜十二策
上皆嘉納又請棄兩淮廢田以給貧民令耕三年以上
量視其入從之歲得粟數十萬斛拜鎮國上將軍海北
海南道宣慰使都元帥會征交趾公私煩費郡邑騷然
惟本道民以不擾頃遭黎寇之地所向焚蕩民無所歸
發廩賑之然後上聞活者萬計島夷蜚蜚畏威慕義有

同齊民董屯田治鹽法百弊悉去大德三年除饒州路
總管兼府尹未行改廣東道宣慰使都元帥其治一如
海南而恩威過之初諸洞蠻二十餘萬負固奪民田以
食租賦不入乃誘致其酋假以官秩曉以福禍令諭其
黨相率奉版籍以歸北軍之戍者不能其水土多瘴癘
死為善藥給諸郡以療之有請增鹽額置轉運司者抑
而屏之民既悅服建遠華樓以壯其觀未幾詣行省白
事因移疾求解職不許請于朝又不許越父老聞之爭

赴臺省乞留乃還尋除都水監換正奉大夫通州多水患鑿二渠以殺之又浚阜通河而廣其堤歲增漕六十餘萬斛而人不病至大元年治水邳徐間訖功求免益堅復命與河南省何平章脩兩淮屯田二年秋得疾還至維揚曰余殆將死矣首丘之義而可忘乎趣歸鎮江舍報恩道院其故宅也疾愈復劇却醫藥戒家人我且死毋事浮屠子坤載封股為粥以進弗納以九月十日薨年六十六明年四月癸酉葬丹徒縣長樂鄉太山之

原郡守以下送者吏民數千人延祐改元春三月其孤以浙東海右道肅政廉訪副使臧夢解所為狀來請銘其墓道嗚呼余知侯有年矣以侯之才之政已過人若此至於知天命之有歸寧屈已以行志憫世俗之苟得寧違時以守貞以世祖之為君而言必嘉獎以順德之為相而事必諮詢居松江減其田之入而上取以法建義塾教其鄉之士而下勸於學非賢且智而能之乎其克終也宜哉曾大父諱明大父諱煜父諱大義宋承信

郎淮東將領娶陳氏繼李氏湯氏子男一坤載也孫女
一銘曰

炎景南謝天戈于征江流湯湯羅侯在荆惟侯桓桓歸
我神武綰符抗旌化極海浦曷憂京師轉粟于南超凌
鯨波夷險一心惟侯之才孰曰不可惟侯之德孰慙于
我低徊卿監亦既升朝未究厥施纓載南影時惟至大
聯軒累益奚侯之明急流勇退不有歲寒孰知松柏翹
翹勁草表於疾風宜一人是知宜大臣是咨胡不永疑

胡不慙遺茫茫故鄉太山之原勒銘周阿過者式焉

白觀先生王君墓碣

唐之季太原王該奉母黃避地江南至廬陵家焉好善
急義世稱長者王家宋紹興中有廬溪先生庭珪與胡
忠簡公銓友皆以剛直名王益顯縣該十五世至迪功
郎次魚次魚生鄉貢進士畿畿生如箎如箎生宜孫仍
孫幼孫宜孫善為文好奇古幼孫字季稚是為自觀先
生性篤孝母劉疾苦痰醫莫之治一日夢讀南陽活人

書或指甘桔湯良覺如夢立愈寶祐丙辰赴闕上書言
國事餘萬言不報歸教授于鄉宋之亡其友文丞相兵
敗執以歸過廬陵謁于驛舍為文祭之期以必死辭氣
忼愾左右嗚咽莫能仰視自是日與賓客過從守經執
禮浩然以終也數詣府陳救荒弭盜之術民賴焉有妖
僧惑衆自利日就禱以千數白于邑屏之某與鄉人處
諄諄然且教且諫有闕者輒自解曰獨不愧王先生乎
嘗宿友人胡斗南菜羹亭食有羹曰古人食必祭即唱

四句曰惟神生也何神逝也何處飄然乘風尚或余顧
食已危坐至旦曰予逝矣予逝矣未幾卒于家年七十
六娶劉氏勤儉孝慈先三年卒子男七福德吉長觀真
東福德長蚤世女適彭嘉龍孫男二留祿卒以大德二
年正月十有一日葬以二月三日墓在邑之里田大山
之原有中庸大學章句二卷太極圖說擬荅朱陸辨深
衣圖辨經籍論易通貫三為一圖家傳譜系簡便經驗
二方各一卷雜著若干卷歐陽先生守道謂其學從陸

氏文自蘇氏云烏乎亦尚德博雅君子哉延祐改元閏三月其子真以狀來京師乞銘真又賢宜銘銘曰

死可生生可亡孝且忠窮何傷螺之山下有江江洋洋王氏昌

靜山處士陳君墓誌銘

饒之安仁有隱君子曰陳恢叟恢叟之父甚賢而貧有曠地數十畝以樹桑為業凡喪祭冠昏衣食賓客之事皆仰焉又計其贏命其子從師問學恢叟即感憤自奮

與湯東澗吳道心諸老游非聖人之書弗敢著於心非
君子之行弗敢服于躬早作而夜思期不負其親而已
學益明行益高於是近者曰陳先生吾師也遠者曰陳
先生吾師也翕然慕而從之有終恢叟之身弗改事者
諸門弟子間相與謀欲請為廣其業遽止之曰毋累我
毋累我且為歌詩以喻其意與仲父起元俱號稱君子
其脩身事親治家居鄉之道人取以為則焉大德二年
九月十有九日無疾而逝年五十一恢叟諱應洪自號

靜山居士曾大父文炳大父彥雲父麗娶某氏子男三
長曰垕齡慶遠路龍溪書院山長為翰林國史院書佐
次淵次日新為老氏學賜號崇玄冲道明復真人孫男
三能爲英女一延祐改元夏四月垕來告曰不幸先子
棄諸孤且十有七年矣惟是貧弗能禮也殯于里之楊
園將以某日啓葬于鄉之古塘惟垕之不肖幸以筆
札從公于太史氏日新又以祠官事今上獲從公游且
並辱公之知非公之文將何以慰先子於地下而垕死

有餘痛願公曰之銘予為之題曰靜山處士陳君之墓而銘之曰

古人云渭川千畝竹可以比封君江陵千樹橘可與千戶侯等然其人所以垂後著稱者亦如是而已陳氏徒賴區區數畝之桑卒饜詩書之澤至於今弗替而益大世獨以長厚聞豈非賢哉

海北海南道宣慰使馬府君神道碑

海北海南道宣慰使馬君卒之二十三年子壽祖赴調

京師既授撫州臨川縣尹來言曰壽祖無肖幸賴先人
餘澤曩在南城獲知於公今又有臨川之命是天以壽
祖卒教于公也惟先公沒且葬有年矣諸孤寡弱無以
承先志使先公之行不大暴於天下夙夜是懼惟公賜
之銘敢以狀請君諱成龍成都廣都人世為大官曾祖
珏某官祖德顯某官父某某官君少有大志涉獵經史
善騎射至元十三年師入宋宋太皇太后詔内外悉罷
兵内附君以右武大夫濠州團練使利戎司金都統制

承宣使奉常德府印綬版籍詣轅門降夏入覲召見賜
金符授昭勇大將軍昭州安撫使屬以兵徇下湖南江
西廣東西一十六郡遷昭毅大將軍招討使尋拜輔國
上將軍海北海南道宣慰使到部惠安祇庶招徠黎獠
置屯田以養軍脩庠序以勸學政化大行屬征交趾公
私煩費君供給罔後而民弗擾又出新意造大艦數十
號海哨馬部至廉州師賴以濟三年謝歸治第潭之城
南教子孫宴賓友割田分金以賑之居善藥以拯疾怡然

以終二十九年十有二月二十有八日卒年六十有六
夫人婁氏宋總制泗州軍馬順之女貞淑慈儉至大四
年春三月二十有一日無疾而逝冬十有一月二十有
三日合葬善化縣長沙鄉巽山之原子男五興祖明威
將軍鎮巢副萬戶沒王事壽祖承德郎撫州路臨川縣
尹兼勸農事復祖襲守萬戶承祖光祖女適忠翊校尉
潭州路湘潭州判官趙伯顏孫男三德孫堅孫福孫女
二銘曰

物盛則虧時過則微天命豈常有德乃歸惟宋之亡仁
哉太皇母俾我民而病我疆列郡承風涕泣內附市不
易肆野不易處惟蜀馬氏世祿于趙承宣既來亦以內
詔智符擁衆還迪于南招降納叛威愛允覃載輯海邦
高牙大纛政治化流胥暨時教進不違天退不待年盤
盤長沙大第雲連宋祚有終馬氏罔墜巽山之碑過者
墮淚

程某夫人齊氏墓誌銘

新安處士程某之夫人齊氏年五十有八以至元二十
有六年五月八日卒又明年十月某日葬里之長原又
二十有三年處士命其子復心請銘于某同宗也夫人
諱靜真世為鄱陽大姓祖某父某母某氏幼孤無兄弟
鞠於從父從父憐而愛之析其產半以嫁半以立其父
後為父後者弗成厥家家破并奪夫人產以自益夫人
既歸程氏或勸處士言之邑夫人止之曰從父所以立
先人後者願以承宗祧也不幸而至於此復以我故而

罪之將如宗祧何處士曰吾意政爾乃止事後姑盡其
孝相夫子盡其順治喪祭昏嫁給賦役延名師以教子
常易奩具以濟其乏慈儉雍穆儀于內外臨終猶戒其
子善事其父治喪勿用佛老嗚呼可謂賢矣子男二若
水復心皆賢而文復心上四書圖說將與秩以父老引
年以本郡儒學教授致仕時年六十孫男二遲遜女二
長適顧某曾孫男若干人女若干人銘曰

為孝女為賢婦為慈母而早死使存也始與夫子偕八

十有四而死也二十有六年吁其天乎

邠州大開元寺喜和尚塔銘

皇慶二年秋八月十有八日邠州大開元寺圓融洪辨
大師右脇累足而化光發屋外年五十三僧臘三十五
荼毗舍利湧出葬東岡明年夏六月其徒行秀為狀願
銘塔石師名法喜王姓邠之新平人父選母甯七歲隨
親入佛廬即樂而忘返稍長願從浮屠學當州洪福寺
講主性公法行高峻遂從受戒具十八遊大梁事孝嚴

溫公溫公門徒千數師出其右居五歲竟代溫主講席
已而去之五臺山入關道益著所至升座講說人見有
異氣熊熊繞身歸者日衆又慨然歎曰佛法非顯不傳
非秘不尊詣京師謁大金剛上師膽八一見授以秘乘
成宗即位賜號圓融洪辨大師主當州洪福寺明年改
平江雙塔寺講主一夕夢異人告曰寺將有劫難師宜
急去因北還寺果沒於海濤被旨居開元而開元與雙
塔皆頽圯久師至輒大其棟宇廣其延納自施大藏經

一藏于開元雙塔雖淪廢而開元至今賴之度弟子三千而行秀居首嗣法五十而可宗居最惟師夙悟真乘生應法運顯秘並行而弗悖功德兼隆而弗居非混沌洪融獨見特立者能若是哉銘曰

佛以時出法由運興惟茲喜公兆自七齡洪福發藻孝嚴避鋒杖錫五臺振衣闕中白毫出頂緇衣雲從爰來京師秘密是宗三承景命往主弘刹昔無完壙今若貝闕神人啓夢我道斯皇林林學徒惟師是望云何長往

金溪縣志 卷二十
秋月麗天師來無期同法永延

吳君載墓誌銘

始余與金溪吳氏仲季事族祖徽菴先生于臨汝精舍
意相得驩甚至元丙子以來余日有事於四方率數歲
乃一集集率一二日去余悲之然猶冀其相見之未艾
也大德五年聖可死余銘之九年時可死余銘之余始
痛其離闊之無窮期矣今時可之嗣屋子又死焉其仲
弟應子亦又以銘累余嗚呼以時可為父而喪其冢嫡

以聖可為季父而殞其猶子以應子為弟而哭其長兄
豈天故短其命欲余銘耶何銘之忍也屋子字君載其
學有家傳復從馮得一先生受詩益邃於理治內制外
執經行權咸協于中余數與語芥利祿泯臧否遐瞰高
蹈泊然獨立有隱君子之風柰何嗇於天而不得中壽
以死余懼天下之為善者自怠為惡者之日侵也然死
生命也君載之心固在此而不在彼也余獨悲與君再
世相知而遽爾也則亦已矣焉耳時可諱德溥宋登仕

郎聖可諱可孫宋進士及第尉瑞之新昌入國朝為建
昌路儒學教授諱堯仁諱士亨者君之曾大父大父也
三世皆為名儒配曰葛氏先卒繼俞氏子男二斗孫婁
孫女二長適鄧承先次適上官瑜孫男二增坤女四以
皇慶二年九月某日卒年五十二以明年某月日葬延
福鄉福林原銘曰

生不並世兮余孰與之相從相從而不我知兮孰戚欣
于厥中十年而三銘其人兮得不為之哀恫邈緬緬兮

前者不可作而後者不可窮

周仲芳墓誌銘

周氏出姬姓有居撫之金溪者為儒家且五百年藤州
守衆七世孫曰桂芳字仲芳種學績文好仁急義蚤有
名郡邑間余家相距三舍而未之識人謂仲芳曾大父
監建寧府都作院冕大父監江州湖口鎮公儀父登仕
郎需子三世皆非通顯其騰蹕驚奮揚英飛烈焜霍千
載者必在仲芳已而仲芳持家亂離息影太平樹果植

花彈琴詠詩消搖褻羊以樂其志以善其身以裕其子
孫而已人又幸曰夫有德者必壽仲芳嘗侍父疾五年
衣不解帶保鄉民數千垂絕之命於阡危睚眦之間可
謂有德矣竟以皇慶二年十有一月十八日年六十一
而卒嗟乎所謂天者誠不可知矣然視世之顛隳貴富
恣睢形勢身死名滅者不既多乎此固仲芳之志也將
以某年月日葬某鄉某原其孤以狀介其友至京師乞
銘余聞仲芳之為亦可謂鄉里之賢者也乃叙而銘之

仲芳娶余氏先卒男四德厚鎮江路官醫提領德謙為從弟後德懋早世揖方力學女一適鷺洲書院山長鄧觀國孫男女若干人銘曰

為學不顯其道為德不食其報閼青山兮終老青山我
我吁其柰何

故同知處州路總管府事袁府君神道碑銘

世祖即位二十有七年某被旨求賢江南時四明袁君以永嘉之命居里以應詔不起後數年與君之子楠同

與史事相知狀君平生請為墓道碑文烏乎君諱洪字季源索氏之先轂宋嘉祐中為開封進士蘇文忠公守杭為通判終處州守贈光祿大夫其宗慤亦舉進士為祥符丞因家祥符祥符生贈少保謂少保生贈太保皋靖康亂從青州軍還四明太保生贈太師衛國公昇嘗攝治大獄連千餘人悉焚其牘太師生同知樞密院事資政殿大學士銀青光祿大夫奉化郡開國公致仕贈太師越國公韶越公幼學于族父正獻公變嘉泰中與

正獻公俱坐道學廢後繼為侍從尹京十年居政府號稱能臣生中散大夫嚴州守似道賢如其父君其仲子也曾祖妣太恭人楊氏贈齊國夫人祖妣吉國太夫人陳氏贈周國夫人妣恭人王氏贈令人君七歲通詩書春秋十七以澤監鎮江大軍倉京尹馬樞密光祖辟為佐以敏達聞禮部李尚書伯王中書劉舍人震孫皆以治劇才薦改佐兩浙轉運幕轉運使胡太初阿僻君數謝病去不許度宗聞其名用為太社令宰相賈似道不

樂四明人君與同郡為侍從執政守倖者六十餘人皆被廢日相從講學口不挂時事賈後悔起奉華州雲臺祠祿咸淳九年通判建康明年冬國事日蹙大帥趙潛委以府事出督江上兵城中大駭夜縱火剽掠相率出郭去君密捕斬首亂數人乃安諸將益桀驁日以語侵君且請較射君出私帑具賞與射君先發三矢三中衆驚服潛遁諸將釋兵歸又聞賈平章兵敗保揚州淮西總領費伯恭遁入海乃微服詣行在所授浙西安撫司

主管機宜文字改松江制置司參議官不拜而歸明年
天兵下臨安至元十五年入覲召見授朝列大夫同知
邵武路總管府事二十年改温州並以疾辭大德二年
改處州命下而卒二月十有八日也年五十四葬鄞縣
桃源鄉慈溪之原君早從王鑑先生學戒以躬行守而
弗失父事兄賓州浚一物不私有嚴州遺澤二以讓兄
子馬公嘗命徵責旁縣不受令潛說友為轉運檄督寧
國絹十六萬匹曰此絹自嘉熙以來名存實亡莫若止

取景定至今年逋且昔者嘗以不能謝馬公矣潛恐蠲數夥亟命他吏卒如公言初至建康慮因句容治偽造楮幣者縱連坐二百餘人宋之亡諸無賴往往以小眚眦構陷衣冠之士陳叅議允平者在陷中帥府命招討王世強捕治君儒服入白且語帥曰新附之民人情未安不絕告訐羅織之禍非所以示綏懷也帥悟釋允平自是叱去上變者君還自建康即去聲色謝榮利延師教子盛饌樂賓客人有不能喪葬昏嫁者出財以相之

有疾為藥以救之有過委曲覆護之不及中壽而卒識者惜之唯君承七葉之盛貫六籍之蘊際興亡之會進不阿以苟容退不矯以自潔安時委運以明哲終豈不謂善人哉予昔不能力薦之天子今乃得宣遺美託金石故樂為之辭君娶史氏宋太師丞相越忠定王浩之曾孫資政殿學士贈太傅忠宣公彌堅之孫直敷文閣荆湖轉運副使賓之之女有淑德再娶楊氏五世居太學父曰應翔太平州判官子一桷也翰林待制文林郎

兼國史院編脩官夫人出女三長適宋丞相史莊肅公
嵩之之孫似伯次適工部尚書余天任之孫昌期次適
資政殿大學士史岩之之孫益伯孫男三章早世璿琬
俱力學女四長適同知餘姚州事趙孟貫餘在室銘曰
昔在宋世有赫素氏宋祿有終素氏罔替優優處州濯
濯厥聞太守之子樞密之孫惟君之生遭世多艱任運
而行益光厥先末承休惠三辭郡貳命雖不猶義則弗
置有子郁郁有孫奕奕有之似之維民之則

揭應強妻何氏墓誌銘

豐城處士揭君應強沒之十二年配孺人何氏卒子侔
美哭幾絕語其諸弟史館編脩侯斯曰吾不德禍及吾
母吾向者以汝獲識翰林程公公天下士也辱銘吾母
吾死且瞑目然今我不可以見汝其為死請公仁人必
不我拒若然則汝亦與有榮耀焉侯斯以狀來請孺人
諱妙靜世為豐城人宋禮部延世之曾孫性勤儉好詩
禮景定甲子歸于處士遭罹多艱不失婦道處士既沒

撫諸孫盡其愛晚好佛老氏蓋賢婦也處士字子常祖大成父三畏皆以德自好叔父三京嘗為貴州鬱林令有聲處士文行脩明為鄉里所師其居多竹人稱之曰森王先生孺人以宋寶祐庚戌三月三日生以延祐元年八月二十九日卒子一倬美多材膽智好吟詩至大中求祖之所自出至於南海帥府檄為潮陽掾已而棄歸益足世其家者孫男三壬午生申金壁女三洪智早世來崇許適徐引兒為從兄壻之婿范清女以明年某

月日葬于某鄉某原銘曰

婦人之德不出于閭非其子之賢曷以示無極


許幾先墓碣

延祐二年春三月七日天子始策進士廷對者五十有
六人國子生盱江許晉孫與焉授將仕郎南城丞廼輯
大父處士君善行來拜曰晉孫不肖幸塵末第歸拜二
親而吾祖不及見矣惟吾祖之墓未有所表著者敢請
君諱開字幾先其先汴人宋南渡始宅盱曾大父晦之

大父昌宋團練使父通宋進義校尉君幼孤立志勇自立身長七尺能蹶張挽強晚好易明歷數善相人論禍福如辨白黑諸貴勢大人多禮致之有名江湖間至元中詔徵江東謝枋得過盱相見傳舍中與語一日夜執手不忍別居鄉尤以孝友稱年近九十猶能日書細字數百坐語至夜分乃寐大德九年六月九日無疾而卒年八十有九三日而歿貌如生延祐改元冬十有一月庚申葬南城太平鄉金塘之原配趙氏與君同年生先

二年卒子男二炎明時霖好老氏學女一柔嘉適徐孫
男三晉孫益孫鼎孫女二端婉皆適徐銘曰

天之蒼蒼吾可厯乎物之茫茫吾可極乎前之積後之
昌非人之則乎



雪樓集卷二十